

أحلام منسية

مونودراما

سعيد حجاج

لوحة 1

(مخزن الملابس فى المسرح القومى القديم .. يوجد بالمخزن العديد من الاستاندات المعلقة عليها الملابس المسرحية المتنوعة .. نستطيع ان نرى فى فى اماكن بارزة من المخزن استاند عليه ملابس صعيدية ويمثل شخصية الاب .. ستاند يرتدى ملابس غمراة صعيدية ويمثل شخصية الام ..بالاضافه لاحد الاستاندات الذى يمثل شخصية المخرج كما يتخيلها مخرج العرض .

يوجد باب فى الصدارة نراه بوضوح تام)

- احلام الممثلة الوحيدده على المسرح ترتدى ملابس تدريب بالاضافه الى انها يمكن ان تستعين بالملابس المناسبة للشخصيات التى تمثلها كما يمكنها ان تستعين ببعض الاكسسوارات .
- بينما يتوافد الجمهور تكون الممثلة جالسة فى صمت امام شمعده هى فقط التى تضىء المكان

احلام : غدا وغدا وغدا .. وكل غد يزحف بهذه الخطى الحقيرة يوما بعد يوم . حتى المقطع الاخير من الزمن المكتوب . واذا كل مأسينا قد انارت للحمقى المساكين الطريق الى الموت والتراب . الانطفئ ايتها الشمعة الوجيزة . مالحياة الا ظل يمشى على الارض .

(بينما تنفخ فى الشمعة يسرب ضوء خفيف

كخيط شعاع لنرى الممثلة فقط)

ممثلى مساكين يستشيط ساعة على المسرح ثم لايسمعه أحد . انها حكاية يحكيها معتوه ملؤها الصخب والعنف ولا تعنى اى شىء .. اى شىء \ .
(بعدها تسطع الاضاءة فى المكان)

احلام : صح . صح جدا .. ممثلة مسكينه تتبخر ساعه ولا عشرين ساعه على المسرح
وبعدين مايسمعهاش حد ولا حتى يفهمها . انها حكاية تحكيها معتوهة ملؤها الصخب
والعنف .. ولا بتعنيش اى حاجه .

(تتحرك فى المكان لتتليس شخصية صعيدية
وتبدا فى العديد)

من شافنى نضحك ونتبسم والقلب جوا الحشا مقسم
من شافنى لابسة تيابى قالوا العوازل خاليه البالى
من شافنى لابسة الطرحة قالوا العوازل لابسة الطرحة
(تنتقل لعديد آخر)

ابكى يا عينى واجرحى خدك كداب من كاده الزمان زيك \
ابكى يا عينى واجرحى عينك كداب من كاده الزمان غيرك
(فجأة ينطلق صوت رجل أجش من العمق)

المخرج : استوب .. استوب يا احلام .. انتى زفت .

احلام : آسفه يا استاذ آسفه .. ارجوك ماتمشيش وتسيبنى لوحدى .. قولى انا غلطانه فى ايه
؟ وجهنى وانا اسمع كلامك . انت مابتقوليش على حاجه خالص . انت بتصرخ فى
وشى وبس وبعدين تسينى وتمشى . انا الوحيد هنا اللى دايمًا تعملنى بجليطه وقلة
ذوق . لكن انا فاهمه ليه وعارفه كويس

ليه عمرك ماشجعتنى بكلمه ولا حرضتتى على ابداع . فاكرا لما المسرح فضى عليا
انا وانت وخذ تنى على جنب ووشوشتتى فى ودنى وقلت لى ان التمثيل حرام ؟ ابوة
انت وشوشتتى مع اننا كنا لوحدها ؟ .. كانت انفاسك بتحرقنى فى رقبتى . كنت بتفج
زى التعبان فى ودانى . (تبكى) انا زفت . انا مش نافعه . انا ولا حاجه انا عديمه
المعنى والقيمة لانى رفضت يومها اروح معاك . (فجأة بعنف) انت اللى ستين زفت
انت اللى ماتسواش نكله فى سوق المبدعين .. انت اللى انت اللى فيك كل العبر
وكبيرك تنظم مرور فى ميدان العتبه عشان ماحدش يخطب فى اخوه . انت جاهل
عديم الفهم وعديم الرؤيه وعديم كافة شىء ربنا خلقه فى المسرح . فاكرا لما قلت لى
اندمجى مع الشخصية واندمجت ؟ وخرجتتى من ام الشخصيه وحسست على
ضهرى ؟ طب فاكرا لما نزلت سكينه الكهرباء وقلت فرکش . فاكرا يومها القلم اللى
طرق على قفاك ؟ اكيد فاكرا كل تفصيله من تفاصيل يومك الازرق اللى يستحيل
تنساه طول ما انت عايش . عرفت ليه بقى انا زفت وفاشله وعمرى ماهورد على
مسرح . ؟

علشان انا احلام وقلبي مليان احلام ولا عمرى فكرت لا ف ستره ولا جواز ولا اى
كلام مالوش معنى انت بتقوله لما بتدخل دماغك ممثلة وتبقى عاوز تساوها .. طب
فاكرا لما قلت لى اندمجى نص نص ده شغل ملحمى مش عاوز اندماج . وانا اندمجت
نص نص وانت اللى اندمجت ؟ ولما نزلت ايدك من على جسمى صرخت يومها .
وكتمت صوتى بايدك ..

ساعتها عرفت انك نويت تكتم موهبتى وتسجنها زى ما كتمت صوتى يومها

اظلام

لوحة 2

(احلام و كانها تخرج من تحت أنقاض الملابس)

احلام : إنت اللي ستين زفت .. انت محبط زى كل الرجاله اللي حواليك .. غور فى ستين داهية يامحبط يامقرف يامدعى . وده اللي انا قررت اقوله من يومها و اعلى صوتى فى وشك حتى لو كان ده اخر كلام ممكن أقوله .ايوة لازم اقوله كده اول مااقبله بكرة فى البروفه حتى لو كان كلامى بره الدور اللي يشبه بالظبط ادوار الكومبارس وانا اللي رضيت بيه علشان اثبت انى ممكن اصنع من شوية هرتله دور عظيم يفضل باقى حتى بعد ماتطمسنى الظروف والحياء والقهر .

لازم اول مااقبله اعدل فستانى وارفع راسى واخد جيست عظيم واقف على طراطيف صوابعى واكلمه من مناخيرى .اسمع يابتاع انت يالى اسمك مخرج . انا الف فرقه تتمنانى امثل معاها . الف مسرح فى الشرق والغرب والجنوب والشمال . انت فاكرنى ايه . ماعرفش الجهات الاربعه للكون ؟ فاكرنى لسه ناشئة مبتدأة .. كومبارس . لسه باتعلم ازاي تكون الخطوة ع المسرح . لسه فاكرنى لسه باتعلم امشى ازاي واقف ازاي واكون ازاي ؟

(تقف أمام المرآه لتتقمص اليكترا)\

نعم .. أعلم ان حالى شديدة السوء كما أعلم تماما مقدار شدتى وصلابتى . ولكننى على الرغم من هذا كله لن اقصر عما انا فيه من استنزال السخط واللعة على المجرمين ماتنفست . ومن ذا الذى يرى هذا القلب يشعر بما انا فيه ثم يحاول ان يعزىنى . لن يكون لسخطى حد . وسيكون انينى ابدى خالدا كالألمى .

ص المخرج : قلت لك زفت .. زفت .

احلام : " لاتغيره انتباها " واى حد أستطيع ان اضع لما انا فيه من يأس وقنوط .. اى الناس اتخذوا لأنفسهم هذه السيرة ؟ لو ان بين الناس من يسلك هذا المسلك فأنا أود الا أنزل من قلوبهم منزل الرضى والكرامة , كما أننى أود أن يدفعنى وكل محب للخير ان انا كفكفكت فى قلبى غلواء هذه العواطف الشريفة . فعواطف الألم يبقياها الحرص على تشريف الموتى , ألا فليهلك ابد الدهر بين الناس . الرشد والتقوى , اذا كان حظ من فارق الحياة أن يبقى مهملا منسيا كأنه تراب غير حساس . واذا لم يلق المجرمون جزاء ماأقترفوا من الإثم .

ص المخرج : برضه زفت .. وعمرك ماهاكونى غير زفت .

احلام : يخجلنى أيها الاعزاء أن استرسل أمامكم فى هذا الألم الذى لاحد له , ولكن عاطفة أشد منى قسوة تقهرنى على ذلك فلاتلومونى فيه .الى اى حد من الجرأة يجب ان تكون هذه المرأة قد وصلت حتى يتصل الحب بينها وبين هذا الفاجر ؟ " تشير الى استاند المخرج " انها لتسخر من إنتقام الآلهة وكأنها تعجب بما اقترفت .. فإذا اقبل اليوم الذى خدعت فيه

أبى وقتلته من كل شهر .. أقامت الحفلات الراقصة وقدمت الى الآلهة القرابين والضحايا . وانا الشقية أبكى وأنتحب لهذه المناظر , ولو انى استطعت ان استرسل كما اشاء الى هذه الراحة الحلوة , راحة سكب الدموع . ولكنى لا أكاد افعل حتى

أسمع هذه المرأة التى لاحظ لها من كبر النس الا فى الفاظها تتحنى على باللوم
وتتقلنى مسبة وازدراء . تدعونى موضع بغضها ومرمى انتقامها السماوى وتسالنى

:

ص الام : إسمعنى انتى من دون البنات مش عاوزة تشتغلى شغلانة محترمة ورايحه تشتغلى
مشخصاتية . ليهلكنك اليأس .

احلام : كذلك يتناولنى لسانها بالمسبة . ولكنها ما غن تسمع بقرب عودة اوريستيس حتى
تستشيط غضبا .

ص الام : ماتفكريش ان ابوكى راح يسبيك تعملى اللى انتى عاوزاه .

احلام : ويصحب هذه الكلمات صراخ وعويل والى جانبها يقف الرجل الذى يزيد غيظها
حدة والتهابا . هذا الجبان " تشير نحو المخرج "

ص المخرج : استوب .. استوب .

احلام : هذا المجرم الذى ملأ يديه فجورا . هذا الذى لايحسن الحرب الا مع النساء . وانا
انتظر من ينقذنى من كل هذه الالهانة .. وأموت منتظرة . فماذا يؤخر عودته ؟ ماذا
يؤخر عودته ؟ ماذا يؤخر عودته ؟ . " يعلو التصفيق المتخيل من الجمهور بينما هى
تحنى محيية وتشير للجمهور بالقبلات وهى تدمع من الفرحة .بينما يظلم المسرح

إظلام

لوحة 3

(تسطع الاضاءة على المسرح بينما هى فى حال آخر)

احلام : مافيش مخرج لحد دلوقت اكتشفنى .. مافيش مخرج ابن حلال قدر يفهمنى ويصبر
عليا ومايصربعنيش .. بالهداوة يسلمنى ودانه , وقلبه يبقى معايا مش ضدى . انا مش
زفت ياأستاذ مش زفت . انت اللى مش فاهم اى حاجه . تقدر تقولى ايه هو تاريخك
الفنى ؟ انت بلاتاريخ وعاوز كل اللى حواليك من غير تاريخ زيك .. عاوزهم يفضلوا
اقزام عشان تبقى انت العملاق الوحيد فى وسطهم . انت كل اعمالك سلق بيض .
مسرحيات معلبه وحمضانه ومنتھية الصلاحية زيك بالظبط . الفلوس لحست عقلك
وبقيت الغالى بالرخيص . الفلوس رخيصه مش باقية . الفلوس ضد الخلود وضد
الحياه . غور فى ستين داهية يامدمن يامعرف ياعربيد .. تاريخك مزرى وحقير زيك
تمام .. وانا مش زيك ولاعمرى هالبقى زيك . ومش هالمنشى مهما همشتنى
وصغرت دورى وقصيت من لحمى الحى . انا هافضل فى مسرحى . بتاريخه ومجده
. بعظمته وازماته . بكوميدياته وتراجيدياته . انا مولوده هنا وهاموت هنا وماحدش
هايقدر يخرجنى . (نقلة اخرى)

أصل الأستاذ عنده مشكلة . اتجوز أربعه .. لا لا خمسة . طلق اتنين وانا لازم اسد
مكان الرابعه (تقلد المخرج) انتى زفت يااحلام . انتى ماتنفعيش ممثلة لكن ممكن

تتفعى تبقى بس مرات مخرج عبقرى زى العبد لله . ويشاور على نفسه . كبرى
دماغك وسبيك من المسرح وبهذلة المسرح وسهر المسرح وغلب المسرح وربيلك
عيلين ياخذوا حسك لما تعجزى . عمر المسرح مانصف حد .

(تتشح بشال صعيدى)

لأ يامتولى لأ . انا مش خاطية .. انا مظلومه . كان ايه خلى امك وابوك يحكموا
رايهم ويجوزونى عوضين ابن ستيتة ؟ وانا مش رايداه يامتولى ياخوى ؟ ماحبتوش .
ماقبلتوش . لكن حبيت غيره . والحب عمر ماكان حرام ولا عيب ولا مكروه فى
الكتاب ربنا . وانا بنى بدم لحم ودم وقلب وروح وحقى ارتاح فى حضن اللى انا
رايداه وهو رايدنى . (تقلد أمها)

احنا صعايدة يابنيتى وبنات رجالة وزى امك وخالتك وكل بنات البلد اتجوزوا برأى
ومشورة رجالتهم مش بكيفهم انتى كمان لازم تتجوزى .

عوضين وتقعدى فى الدار كيف الستات . (نقلة وتعود لشفيقة)

يعنى خلاص ؟ ماعادش فيه من الوعد خلاص ؟ وارتاح واشوف السعد يومين ؟ ()
نقله تعود لشخصية احلام) وانا خلاصى كان هنا وسط الناس والدوشه والمزيكا
وسط الفرح والنور .. قلت لها ازاي يالاه اتجوز واحد مباحبوش ؟ خبط بايديها على
صدرها (تقلد الأم) انكتمى يالام عين زايغه وأوعاكي اسمعك تعيدى الكلام ده من
تانى . هو احنا حدانا بنات فى البلد تقول آه ولا حتى تقول لأ .. ده راجل ابن حلال
مصفى .. مخرج أد الدنيا .

(تعود لشخصيتها) وانا قلت لأ يعنى لأ . لكن مهما مهما قلت ماحدش سمنعنى ولا مد
ايدى يشيل قلبى من تحت تلال الحزن اللى دفناني وكاتمه على نفسى .تلال الحزن
اللى دفنت قلبى وعقلى وروحي وكل حته فى كيانى . قلت لأ يعنى لأ .وزى ماقلت
لأ علشان اعيش . يبقى كان لازم اسبيلهم البلد واعيش مطرح مايكون حلمى ..
وادينى هنا . وعشت هنا .

(صمت طويل تلف بين الملابس وفجأة)

ها بقى .. عاجباك ولا مش عاجباك ؟ هااعيش وهأمثل المهم الجمهور هو اللى يقول
كلمته .. الجمهور اللى من غير غرض غير الكلمه الحلوة والضحه الصافية والروح
اللى بتسرب لجدران المسرح روحها . انا عارف انى ممثلة كويسه وعندى طاقه
تكفى الف ممثلة . لكن لسه ماحدش اكتشفها ولا اداها حتى نص حقها . انت بنفسك
قلت لى كده من اول يوم شوفتنى فيه .صح ولا لا ؟ بس انا مش بيعه وشروة فى
سوق نخاسة ياسيادة المخرج الكبير . (نقلة) ايه ده ؟ ده انا جعانه قوى . (تخرج
من جيبها جنيهات قليلة) فل الفل خمسة جنية صحيحه وشوية فكة . يعنى مايكفوش
اكثر من ثلاث اربع ساندوتشات جبنه وحلاوة . يعنى ولا وجبة اجدع سجينة فى
سجن النساء . . هااكل واكمل تمارين لغاية مايجى دورى فى العرض . مساعد
المخرج عارف مكانى وكل يوم فى معاد دورى بالظبط يجى ينادينى . ساعتها ادخل
البروفه وابدا دورى واراج الخشبة بصوتى وخطوة روحى عليها . قال مش عاجباه
قال ؟ (تنظر فى المرآه) انا مش عاجباك يابوز الاخص (نقلة على شخصية نعيمة

(

واسأل ماألقى جواب .وان جاوبوا القى الجواب هو السؤال نفسه وادوخ ولا البقرة .
متعلقه فى ساقية . والساقية مابتسقى وفى وفى وموتى م العطش ساكته واتلمى
يانعيمة . وحطى ف عينك حصوة ملح وانكتمى . يابت عيب اختشى وخلقى عندك دم
.ده كلام غوازى وعيب ودى مش عمایل بنات والناس يقولوا علينا ايه ؟ يابو البنات
الحق بنتك هاتفضحنا . واحبس فى اودة الكرار واقفل عليها الدار واضرب وأدب
وربى . تكسر لبنتك ضلع يطلع لها ضلعين . مش حوا من ضلع آدم ؟ وحوا هى العار
؟ ونعيمة بصت شمال ونعيمة بصت يمين . ونعيمة ضحكت سمع ضحكتها سابع
جار . ونعيمة متزوقة ولا ليلة الجلوة . مرت سنين وسنين وانا على ده الحال . فتحت
عيني لقيت قلبى على سهوة , فتح ولا الورده , ورده وعطشانه نزل عليها الندى
والنور فى غنيوة . غنيوة قالها حسن (صوت ناى) بعد النداء على الليل . والعين
ياليل ياعين . الليل فى قلبى سمعها طلع القمر فى القلب , يمينه ويميني بغنوة . غنوة
حب . طلعت فوق السطوح زى البنات أسمع . لقيتني زى الحمامة طائرة فى العالى .
فوق الفرع كله . خدنى يا حسن واطلع . اطلع معاك السما . يافرح تعالى لى . غنوته
كانت جناحى . قوتى ف مسايا وصباحى . (نقلة)
ايه ده ؟ نسيت حتى اكل . دايمانى اكل .. دايمانى . امبارح حصل برضه كده
 . واول امبارح وكل مرة اقول الكلام ده . وبعدين يسيبوني ويروحوا والمخرج يبقى
بيتعمد ينسانى بعد مايقولى فى اول البروفه انتى زفت يا احلام . وابقى باحلم انى
اخلى اول ليلة عرض واسمع تصقيف الناس يرن فى ودانى . ساعتها ابتسم
واحبيهم بحرارة . وابص قدامى ما الاقيش حد .. ما الاقيش ناس . يغرقنى الحزن
واتوه اجرى على هانا . اتمرن واغير فى الهدوم الميتة على الشماعات واصحبها
تترد فيها الروح وتترد معاها روحى . المسرح ده دنيتى وروحي والمخزن ده هو
اللى اندمجت فيه مع كل الادوار العظيمة اللى حبيبها وكان نفسى اكون مكان اللى
مثلوها . فجأة وانا فى احلامي وهلاوس عقلى يدخل عليا عم عبده بواب المسرح
يقولى : انتى لسه هنا ياست ؟ ده الجماعه كلهم مشيوا . يشوف فى ايدي نص
السندوتش وفى الايد الثانية مسرحية باعيشها يقف ويقول فى سره ربنا يشفيها .
اتنرفز واصرخ فى وشه . انت اللى ستين مجنون . انا مش مجنونه . انت مالك بيا ؟
يكونش المخرج مسلطك عليا ولا المدير قالك ماتخليهاش تقعد ومشياها . ماحدش هنا
عاوزنى اتنفس مسرح ولايصحى جوايا شيكسبير ولا راسين ولا فيكتور
هوجو ولاسرور ولادياب ولا ميخائيل رومان ولا اى حد خالص . عاوزين يسيدوا
الاراجوزات الصغيرين اللى بيكتبوا لاكل العيش مش اكثر . تحيا التفاهه ويحيا
المجون وتحيا كل قيمة تمحى المسرح من حواليك . تطلبني مسارح القطاع الخاص
اعمل دور فى مسرحية الاستاذ احمد طعمية . اقول لأ . وارفض بعزم الروح اللى
جوايا بتعشق المسرح . وافضل حائرة بين الجوع اللى بيمزع بطنى وبين المسخرة
اللى بتموت عقلى . ادخل فى حيرة غريبة . اهز دماغى بلامعنى يقولى خلاص
خليكى فى اللى انتى فيه . يمكن بكرة ترجع صواميل مخك الخربان لحد اما تجوعى
وماتلقيش اللضى ولا حتى تمن وجبة المساجين . (تطرق الباب لا احد يرد عليها
فتنظر من ثقب الباب فلاتجد احدا) ياعم عبده .. انا خلصت تمارين تعالى افتح لى

بقى . انا جعت حرام عليك .. انا مش فاهمة انت ليه قفلت الباب . عم عبده انت فين . انا خلاص عاوزة امشى من هنا . انت قفلت الباب ليه بس ؟ انت نمت ولا ايه ؟ ياراجل ياطيب ربنا يهنيك فى نومتك . انا بقى مش عارفه انام . اول ما احط دماغى على المخده خمسين شخصية تنط فى دماغى يشاغبونى . خمسين شخصية او اكثر حلمت بيهم العبهم على المسرح .. بس كل ما افكر كلام المخرج وهو بيقولى انتى زفت يا احلام ويشد فى شعره اكره العالم كله واحط المخده على دماغى وعينى وودانى . ابقى مش عاوزة اشوفه ولا اسمع صوته ولا اسمع صوت اى حد . ماتفتح بقى يا عبده . ايه انت مابتسمعش ؟ افتح فى عرضك الجوع هايفرتك بطنى . ممكن يكون راح يشتري حاجه وراجع ؟ ممكن يكون راح فين بس ؟ (تصعد الى اقرب نافذة) مافيش حد . مافيش حاجه خالص .يعنى ايه الكلام ده ؟ (تتذكر كلمات المخرج)

ص المخرج : النهارده اخر يوم بروفه فى المسرح . وبعدين هايرمموه . احلام : يانهار اسود .. ايوة هو قال كده فى اول البروفه . قال اخر بروفه النهارده وبعد كده هايرمموه . يعنى مش هايجوا تانى ولا ايه ؟ يانهارك اللى مش فايت يا احلام . مش معقول اكون اتحبست وماحدث هايسأل فيا والكل نسيونى . 0 (تضع اذنهما على الحوائط) مافيش لاصوت ولا مخلوق . وبعدين ياربى فى الكارثة دى .؟ لو صرخت ماحدث هايسمعنى اكيد (تبحث عن تليفونها المحمول فى حقيبتها فلاتجده , تفرغ الحقيبة فى ارضية المسرح) لا .. لا كده لا . حتى الموبايل مش موجود . راح فين ده كمان ؟ كان لازم حد ينبهنى ان ده اخر يوم بروفه . كلهم موالسين مع المخرج ومع العالم .. كلهم واقفين ضدى وضد احلامى .. كلهم خونة .

إظلام

اللوحة الاخيرة

(بينما تسطع اضاءة المسرح نراها فى حالة جنون تطرق الباب والحوائط وتصد الى النافذة حتى تخور قواها فتتلبسها شخصية انتيجون فى المشهد الاخير)

احلام : يالهذا القبر اللعين .يالسرير العرس , يالك من منزل تحت الارض لن ابرحه ابد الدهر .سأهبط الى الجحيم قبل ان يحل الاجل الذى كتبه لى القضاء . افتح انا فى عرضك ياعم عبده الباب مقفول وانا لسه ماحققتش احلامى . وانى لأخر اسرتى وأشقاها ولكننى اهبط وانى لمملوءة املا ان اى حد يفتح لى الباب .ويخرجنى من هنا .أيها الاخ العزيز إن يدى لم تهمل ماكان يجب من عناية بك وسقى لظماك وقرب الى نفسك . فانظر ايها العزيز ماانا فيه الآن وماذا ألقى من جزاء على القيام بواجبى ولكن قلوب اصحاب الفضيلة لن تبخل على وتغيثنى من هذا الظلام ومن هذا القبر القاتل وانى لوكننت أما فقدت ولدها او كننت زوجة فقدت زوجها لما فعلت مافعلت مخالفة بذلك ارادة هذا المخرج العريبد ولوجدت من العزاء مايحول بينى وبين اقتراف هذا الذنب . فإن هذا الزوج اذا فقد فمن السهل ان يخلفه غيره .ولكن اذا استأثر القبر بممثلة مسكينة لسه فى اول الطريق لاراحت ولا جت . فليس من الماثور التعزى عن هذا النعيم .لذلك ايها العزيز (تطرق الباب) ياعم عبده افتح انا جعانه وهاموت . لقد آثرتك على نفسى وعلى كل شىء تجرات على كل شىء ولم أخش ان اقف من المخرج العريبد موقف العاصية . افتح الله لايسينك انا هاموت هنا .ز افتحوا لى الباب افتحوا ارجوكم .. مافيش حد .. مافيش حاجه .. مافيش احلام . مافيش مسرح .. مافيش تمثيل ولا جمهور ولا تصقيف .. (تخور قواها تماما) اذن فإنى سأهبط بلاشك الى مقر الموتى .. (تصرخ عاليا) افتحواaaaaaaaaا انا بالموت .

(تخفت الاضاءه حتى الاظلام)
النهاية

سعيد حجاج